

# QWAND R'VINRÈ L'DJOU

Pièce en 1 acte  
De  
Georges Simonis

Rue Au Pré Macar 23 à 4052 Beaufays Tél 04 368 82 76

Répertoire Sabam

## QWAND R'VINRÈ L'DJOU

### Pèsonèdjès :

Roland Rozê	45 ans, prôpriyètêre dès ateliers
Marie-Christine	si fèye, ine vintinne d'annêye.
Michél	si fi, ine vintinne d'annêye.
Mariète	si feume.
Lèclèrcq	li r'prézintant dèl sôciété " Johnson & Kilby "
Debraz	délégué sindicâl dès ateliers Rozê.

Li teûle, tot s'lèvant, mosteûre ine plèce qui chève di burô ; èl si troûve inte li mohone wice qu'on s'tint tos lès djoûs èt lès ateliers. È l'plèce i-n-a on burô « meûbe », ine tchèyîre ou deûs, ine bibliotêke avou tot plin dès classeûrs. È fôteûy qui fêt face å burô, in-ome achou qu'ouveûre divins dès papîs ; c'èst Roland Rozê, li prôpriyètêre dès ateliers ; i pout aveûr 45 ans....A on moumint d'né, i s' drèsse èt va cwèri'ne grande farde avå sès classeûrs... I s'rachèye, louke on moumint... Li téléphone sone : i discrotchs...

### Sinne - 1 - Roland

Roland Alô, Roland Rozê a l'aparèy.. Ah, bondjoû moncheû Balthazar... Awè, awè.. po l'trinte-on di may, n'est-ce nin çou qu'èsteût conv'nou ?  
Divins ... noûf djoûs, c'èst bin çoula.., ni v'fez nin dè mâva song', tot sèrè prêt',

èt dji v'pou garanti qu'i n'âre nou r'târd... Â-d'fêt' di qwè ?

Ah, dès difigultés ?.. mins nos'nn'avans turtos, vos l'savez bin... kimint ? fé'ne creûs so li k'mande ? mins poqwè ?.. vos veûrez pus târd... awè, dji comprin... qui volez-v' qui dji v'dèye ? qui ça n'm'ahèsse nin, come di djusse... awè, awè,... â r'vèy, moncheû Balthazar...

« *I racrotche èt groumiyêye int sès dints...* »

Fé'ne creûs so li k'mande... dès difigultés... nos veûrans pus târd...

« *I s'a drèssî èt rote avâ l'plèce, i passe si main so s'vizèdje...* » Kimint çoula va-t-i fini ? « *I s'rachèye èt tot s'asoyant so l'burô, i catche si vizèdje inte di sès deûs mains ; Ine djône fèye di 20 ans inteûre ; Èle l'èst fwért spitante. C'èst Mariye-Christine, li fèye d'à Roland ; Èle troûve si papa come on vint dèl dire pus hôt, èt tot l'vèyant insi, èle brêt bin reû :* »

## Sinne - 2 - Roland èt Marie-Christine

- M-Christine Binamé papa Rozê, vosse fèye a l'plêsîr èt l'oneûr di v'sohêtî ine bone djoûrnèye !
- Roland Bin n'a nou risse, adon qu'èle sèrè vite so flote !
- M-Christine Il è-st-apreume treûs eûres, c'èst l'bèle eûre !...
- Roland Poqwè ?
- M-Christine Pace qu'èle côpe li djoûrnèye è deûs, èt qu'on pout co fé ot'tant qu'on a dèdja fêt...
- Roland Ot'tant ? qu'avez-dèdja fêt oûy don vos ?
- M-Christine Rin... a pârt mi lèver, mi laver, didjuner, èt...c'èst tot !
- Roland Èt v'pomponner ! Ca vos flêrîz l'odeûr a co cint pas ! C'èst bin damadje qui vos n'passez, ni fouhe qu'ine dimèye eûre è l'atelier, vos-aprindrîz çou qu'èst d'ovrer èt d'aveûr a gangnî s'crosse...
- M-Christine Djans, pa...ni m'fez nin co on mèssèdje...mi pomponer, mi ? Vos sèpez bin qu'dji n'a mâye qu'ine bone dozinne di cotes èt d'bloûses a m'mète so l'cwér...si ç'n'èst nin mâlèreûs...ah,â-d'fêt' di çoula, dji pwète a vosse kinohance qui dj'a rèscontré è l'vèye in-amoûr di p'tit bleû foulârd di nylon...mmm...dji n'vis di qu'ça !...
- Roland Li nylon !...ine ouhène di nylon èt dji sèrèû sâvé !
- M-Christine Qui d'hez-v' ?
- Roland Oh, rin, ni prindez nin astème...dji djâsève por mi...
- M-Christine Papa ?...

- Roland Qu'a-t-i ?
- M-Christine Dj'a'ne saqwè a v'dîre !
- Roland QWÈ ? ?
- M-Christine Oh, papa.. ! « *Èle fêt mène dè tchoûl'ter* »
- Roland Marie-Christine , DJÂSEZ !
- M-Christine C'est qui...c'è-st-ine saqwè d'fwèrt grâve, papa...
- Roland Alez-v' djâser, awè ou nèni ? « *Is'a drèssi* »
- M-Christine Dji v'prévins qu'si vos n'mi payîz nin ci p'tit foulârd la, dji sins qu'dji va atraper l'pus canaye dès complexes ! « *Roland r'tome achou è s'fôteûy...* »
- Roland Vos m'f'rez tofèr atraper dès pawes al vûde !... « *M-Christine rèye* »
- M-Christine Èt vos sèrez djouwé tot côp ! « *Roland rèye on moumint avou s'fèye...* »
- Roland Ça fêt dè bin dè rîre ine miyète...
- M-Christine Dj'ènn'a îdêye...si dji m'rapwète d'après çou qu'dj'a vèyou tot-z-amoussant chal ...vos-avîz bin l'êr anoyeûs...qu'a-t-i qui n'va nin, pa ?...
- Roland Oh, m'fèye !...tot !...li fabrike...lès çans'...mins vos n'sârîz comprinde... « *li djône fèye s'aprépthe di lu èt lî prind s'tièsse inte di sès 2 mains...* »
- M-Christine Èt bin, loukans'on pô çoula...lèyîz-v'aller, moncheû Rozê...si vos v'tinez reû come ine bèye, ça n'vât rin po l'diagnostic ! ..Aha ! dès potches po-d'zos lès-oûy...drovez'lzè bin grands...a la bone eûre...loukîz'è hôt ! i m'sonle qu'i sont foû guides...po veûy lès tchifes...min èle sont plintes d'èwe ... « *tot lès piçant* » èt l'narène?...èle sèrè vite tène assez po poleûr èfiler âs-awèyes !... « *Roland rèye todi on pô pus* » èt, al copète dè marchî...ine pitite bièsse qui monte, qui monte... « *Èle gatèye si papa qu'ènnè pout pus* »
- Roland Djans, Marie-Christine, lèyîz-m' è pàye !... lèyîz-m'ovrer !...
- M-Christine A'ne condichon !
- Roland Quéne condichon ?
- M-Christine Bin...li p'tit foulârd... « *Roland va è s'potche èt prind s'pôrtèfèye* »
- Roland KIBIN ?

- M-Christine Avou lès fâs frês, dihans...mèye francs..
- Roland QWÈ ? qués fâs frês ?
- M-Christine Po n'rin v' catchî...dji sôrtèye !...
- Roland Avou quî ?..
- M-Christine Françwès...
- Roland Kimint,ci n'èst d'dja pus Richard ?
- M-Christine Pa, rimètez voste ôrlodje a l'eûre ! i-n-a pus q'cwinze djoûs qu'on n'si veût pus !...
- Roland Qu'on n'si veût pus èt qu'on n'si vout pus...
- M-Christine Awè !...
- Roland Vos n'avez wère tchipoté po prinde in-ôte !...
- M-Christine Vos savez bin qu'dji n'so nin fête po viker tote seûle, èdon ?
- Roland Èt si dji comprin bin, ci-chal ni pâyè nin lès...fâs frês...
- M-Christine Vos-avez mètou l'deût d'sus ! I dit qu'avou on papa come vos...qui vike so blancs peûs...dji pou bin payî m'pârt...
- Roland Qui...què ? qui vike so blancs peûs, c'est pôr li bouquèt !...Il la dès droles di rapwètroûles, vosse novê galant...so blancs peûs...èl vèyez-v' voltî, dè mons ?
- M-Christine Dji creû qu'c'èst l'bon !
- Roland Oh, çoula, vos l'dihez tot côp !...
- M-Christine Vèyez-v', çou qu'i m'fâreût, c'è-st-in-ome come vos...grand, fwèrt...qui n'si lêt nin djus...ine pitite moustatche èt on bê sorîre !...
- Roland Vos ratakez co ! Prindez vos çans' èt qu'dji n'vis veûse pus ! « *M-Christine apice lès bilèts qu'roland lî done, done on bètch a s'papa, èt brèt, d'èstant so l'hout, djusse divant dè sôrti* »
- M-Christine Roland Rozê, vos-èstèz l'ome di m'vèye ! « *Èle côurt èvôye so l'tins qu'Roland rèspond* »
- Roland Vos d'hez tofêr çoula !...â rés', èle ni compte nin si bin dire...Ah, djônèsse !... « *I s'rimète a l'ovrèdje ; on bouhe, èt Mariète, feume d'à Roland, inteûre è*

*burô »*

### **Sinne - 3 - Roland èt Mariète**

- Mariète Vos-avez vèyou Marie-Christine ?
- Roland Dji n'l'a vèyou qui d'trop' !
- Mariète Qui volez-v' dire ?
- Roland Qui dji so pus lèdjîr di mèye francs !
- Mariète Vos-èstèz trop flåwe avou lèy, vos n'li dîrîz måy nèni !...
- Roland Èt vos, n'est-ce nin parèye ?...li avez-v' dèdja fêt s'mèssèdje ?
- Mariète Ci sèrèût pus vite veste-ovrèdje...
- Roland Vos sèpez bin qu'nosse situâcion n'est nin r'lûhante po l'moumint...èt dj'a lès pinses qui ci sèrè todi pès !...
- Mariète Çoula va si må ?
- Roland AWÈ !
- Mariète Tot l'minme nin po qu'vos djèmihése so lès mèye francs qu'vos.
- Roland Dji n'a pus d'ovrèdje, Mariète..., mètez-v'çoula èl tièsse...Tènè, dji contève chèrvi l'sôciété dès ch'mins d'fêr come d'avance...
- Mariète Vos n'avez nin li k'mande ?..
- Roland Nèni.., on vint di m'tèlèfoner...
- Mariète Bah.., ci n'est qu'ine mâle passe.., vos'nn'avez k'nohou dès-ôtes èt vos-avez tofêr vinou foû...
- Roland Tot mètant foû dès-ovrîs ossu.., tot-z-atch'tant dès noûvès machines.., èt ci sèrèût tot dè long a rataker...
- Mariète Mins si vos payîz lès machines, an r'vanche, vos n'payîz pus lès-ovrîs...
- Roland Vola bin ine rapwètroûle di feume.., si vos comptez qu'ça va tot seû.., si vo comptez qu'c'est mi qui fêt dès bènèfices... Vos polez dire qui c'est nosse calvère d'a turtos, nos ôtes dèl Walon'rèye...
- Mariète Qui volez-v' ?.. c'est l'progrès...rin n'l'arètèye...

- Roland Vos l'avez dit !.. disqu'a m'prôpe famille qui n's'èl lêt nin dire deûs côps... vos djodjowes mi costèt tchîr !.. oh, dji n'djâse nin d'oûy, mèye francs, ça passe co.. mins qwand dji tûze à meûs passé !.. vosse vwètûre.., pace qui madame ènnè voléve eune a tote fwèce.., anfin !... dji continowe : li saminne passèye, li stajè da Michél... , fât-i co raler pus lon ? mi mémwère èst bone so cisse kèsse-la...Èt d'min, qui m'alez-v' co d'mander ?
- Mariète Roland ..., rapôrt a Michél...
- Roland Vos-avez a djâser d'lu ?
- Mariète Dj'èsteû v'nowe po çoula !... Dj'a-st-è l'îdèye qu'i r'nake so l'ovrédje po l'moumint.., i n'tûze wére a sès lîves...
- Roland Qu'èst-ce qui v'fêt dire çoula ?
- Mariète Mârdi après l'diner, dji balzinéve avå l'Gran-Vôye èt...
- Roland Vos balzinîz ?...
- Mariète Dji féve mès coûsses, djans...
- Roland Adonpwis ?...
- Mariète Dji l'a vèyou !...
- Roland Ah !... èt vos trovez çoula èwarant ?...
- Mariète Fwèrt èwarant qwand vos sârez qu'il èsteût on pô mons treûs eûres èt qu' Michél aveût on coûrs qui tchèrives disqu'a cwatre eûres èt mèye...
- Roland Li coûrs a mutwè stu r'mètou.., li profèsseûr èsteût kék'fèye Malåde...
- Mariète Nèni , Roland... po-z-èsse sûre, dj'a téléphoné a l'Université.., li profèsseûr èsteût bin la èt l'coûrs a bèl èt bin stu d'né !...Asteûre,.. i-n-a co ôtes tchwès...
- Roland Tant qu'on-z-î èst !...
- Mariète Michél n'èsteût nin tot seû !...
- Roland Aha !...
- Mariète Il èsteût avou' ne djône fèye.., di si-adje, mi sonle-t-i... Lèy èl tinéve po li spale, li, il aveût' ne main so s' hantche, èt s' bâhît-î tos lès treûs pas qu'i fit !...  
« *Roland rèye* »
- Roland Èst-ce qui c'èst mâ fé qwand c'èst qu'on a vint-ans ?...

- Mariète Lès études èt lès furdignes, ça n' va nin èssonle !...
- Roland Oh, d'on côp lès grands mots !...
- Mariète A-t-i mâqué l'coûrs, awè ou nèni ?
- Roland Bon, dji l'ad'mète , mins...
- Mariète S'il a fêt' ne fèye, èl f'rè co ! Sine sèpi s'i n' l'a dèdja nin fêt saqwants côps ! A vosse sonlant, èst-ce ine mâle âbitude qui lî fât lèyî prinde ?
- Roland Mins qu'èst-ce qui v'fêt dîre qui c'è-st-ine âbitude, parèt ? Michél, vos n'fez qu'd'èl kitchèssî, vos-èstèz tofèr a rawârdèr l'pus p'tite hipète d'a seune, mins po Marie-Christine, vos rafûlez tot !.. Dèssîdémint...
- Mariète Dèssîdémint, vos n'savez fé qui l'doûmièsse avou vos-èfants !
- Roland Li doûmièsse ?
- Mariète Vos'lez r'tovez come vos'lez avez fêt : sins-soucis !
- Roland C'èst por zèls qui dj'ouvéûre !
- Mariète Èt mi, dji n'lès-a nin ac'lèvés ? Qui n'sèyîz' vormint on pô pus deûr avou zèls èt on p'tit pô mons avou l's-ovrîs !...
- Roland Mariète, dji n'vis pèrmète nin ! so l'kèsse di l'ovrèdje, dji sé çou qu'dj'a-st-a fé !
- Mariète Bon, ni v'mâvlez nin ! Mètans qui dj'n'âye rin dit.., mins dji r'vin so Michél : vos lî d'vez djâser, ine fèye a fé, èt lî djâser come i fât ! Quî èst-ce qui s'plind'rè s'il a'ne bûse ?
- Roland Èst-i la ?
- Mariète I studèye è s'tchambe...
- Roland Ah, vos vèyez bin !
- Mariète I sâye dè ratrafer l'timps pièrdou !
- Roland Pô veûy.., quéne eûre è-st-i ? .... Ènn'a co po'ne bone dimèye eûre divant qu' Lèclêrcq ni seûy chal.. Adon, vos polez m'avoyî Michél...
- Mariète Lèclêrcq ? .. quî èst-ce
- Roland Ah ça, in-ouhê d'mâle aweûr, on l'pout dîre !.. c'èst lu qui r'prézinte lès "Amèrlokes"...



- Mariète      Li ci qu'a dèdja v'nou treûs fèyes ?
- Roland      Awè.. tot côp qu'il amousse è burô, li cîr s'aneûrih èt vos dîrîz qu'dji va sèfoker...
- Mariète      Mins qui vout-i ?
- Roland      Nos mète a gn'gnos.. turtos..., nos-ôtes, lès p'tits industriyéls po qu'nos lèanses nos-afêres inte di leûs pates...
- Mariète      Mins si tos lès p'tits si r'mètît èssonle po s'rècrèster ?...
- Roland      Li monde è-st-insi fêt la qu'chaskeun' djêrêye so s'wèzin, Mariète.., èt qwand "on tél ", nâhî d's'aveûr batou, plonke è sankis', lès-ôtes, à pus sovint, ont dèl djôye è leû coûr.., sins sèpi qui l'ci qui tome fêt v'ni d'ot'tant pus vite li rwène da turtos...
- Mariète      Vos-alez trop lon, Roland !
- Roland      Nèni Mariète.., dj'èlzè veû mès vîs camarâdes, zèl qu'èstît prêt'a fé dès mirâkes po leû Wallon'rèye... asteûre, il ont bin candjî, i foumièt dès gros cigâres, i sont d'l'ôte de costé dèl bârîre.. kibin d'timps tinrans-gn'co ?.. kibin d'timps tinrè-dj'co ?.. Crèyez-m', Mariète, c'ènn'è-st-assez po rimpli tot l'cèrvê d'in-ome.. sins co dès-ôtes mâs d'tièsse... i n'm'ènnè fât nin voleûr si dji n'a nin l'êr d'aporçûre mès-èfants a dès moumints qu'i-n-a...
- Mariète      Wârdez vosse corèdje, Roland.., vosse bê corèdje... i m'ènn'èst di v'veûy al dilouhe...
- Roland      Avoyîz-m' Michél...
- Mariète      Qui lî dîrez-v ?
- Roalnd      Dj'ènnè sé nin co l'prumî mot !

#### Sinne - 4 - Roland èt Michél

« Mariète è-st-èvôye houkî Michél ; Roland louke on moumint sès papîs ; Michél inteûre »

- Michél      Papa ! oh, papa, la ,la, la, la, la, la,..... « i tchante »
- Roland      Akeûhîz-v' ! vosse soûr m'a dèdja fêt' ine tièsse come on sèyê avou sès corat'rèyes... c'è-st-inîmajinâbe çou qu'on pout r'mouwer a vint-ans !...
- Michél      C'èst l'sièke la qu'on vike èt qu'on l'mosteûre !
- Roland      C'èst l'sièke la qu'on moûrt vite èt timps !

- Michél Prindez astème, papa, carante-cink ans, c'est l'måle adje !.. ha,ah,ha,ha,...., nèni, c'est po rîre.., come dji v'veû la, i n'a qu'ine bale èl tièsse po v'fé d'hoter...
- Roland Ah, m'fi, on pout dire qui vos-èstèz djoyeûs !..
- Michél Mame m'a dit qu'vos-avîz dès saqwès...
- Roland Awè.. euh.., èt bin vola..., ci n'est nin âhèye...
- Michél Mmmm !.. si ci n'est nin âhèye a v'ni foû, c'est qu'on a' ine saqwè a m'riprocher...
- Roland Vos-avez mètou l'deûgt d'sus...
- Michél Sèrez-v'tot-a-fêt a vosse navète qwand dji v' ârè dit : Corinne ?...
- Roland Corinne ?
- Michél Awè, Corinne.. ine djône fèye, qwè.. on m'a vèyou èl vèye avou Corinne èt on v'l'a rapwèrté.., dji m'dotéve bin qu'çoula arivr'eût on djoû ou l'ôte...
- Roland C'est vosse mame qui v's-a vèyou !...
- Michél Mi mame.. ou' ine saquî d'ôte, qu'est-ce qui ça candje,.. dji n'a rin fêt po m'catchî, alez...
- Roland Mins vos-avez mâqué vosse coûrs !
- Michél Oh, pa.. on coûrs di " socio " ... dj'ènn'aprint pus' tot loukant âtoû d'mi...
- Roland Avou.. Corinne, c'è-st-on djeû, èdon ?...
- Michél On djeû.., on djeû.., vos d'hez vo-minme qu'on djeû n'est mây tot-a-fêt on djeû...
- Roland Vos n'comptez tot l'minme nin...
- Michél C'est mutwè co trop timpe po l'dîre, mins.. dji pinse qui siya...
- Roland Dji m'dimande si vos-avez' ine saquè è l'boubrale !.. vos' nn'avez co po deûs-ans-po l'mons-pus' vosse tîmps d'sôdârd...
- Michél So cisse kèsse-la, nos-èstans bin d'acwèrd, lèy èt mi... nin d'marièdje divant l'fin dès-études...
- Roland Awè.., c'est çou qu'on dit.., mins dj'a passé por la.., on n'a nole nisse, on creût qu'tot s'arindje come dès cèlîhes so on baston.., on fêt l'bièsse èt...

- Michél L'avez-v'fêt, vos ?
- Roland Nèni, mins...
- Michél Adon poqwè l'f'reû-dj' ? Èt pwis, inte di nos deûs la, papa, po l'djoû, d'ouy, li ci qu'fêt l'cwacwa, c'est qu'èl vout bin !
- Roland C'èst vosse mame qui v's-a bouté çoula è l'tièsse ?
- Michél Lèy, de mons, ni s'catche nin podrî s'vicàrèye qwand i s'adjih de d'vîzer so cès kèsses-la èt dji v's-èl di co : n-a qui l'ci qui vike rèssèré qui n'aprinde rin !
- Roland Riv'nans so Corinne.. èle situdèye ossu, dji mådjène...
- Michél Nèni, èlle oûveûre...
- Roland Wice ?
- Michél Èlle èst secrètère al novèle ouhène di plastike...
- Roland Amon lès-Amèrlokes ?.. Vos n'sârîz nin fé on pas sin' lzè rèscontrer so vosse vòye, a bwèrgnî l'bon moumint po v'mète li cwède è hatrê !..
- Michél Dji comprind çou qu'vos r'sintez mins vos-avez twèrt d'èlzè taper so l'costé... C'èst zèls qui nos ont sâvé al guère di carante, èt c'èst co zèls qui vont sâver l'Wallon'rèye...
- Roland Èt c'èst vos qui m'djâse di çoula ? di cisse vîle istwère-la ? mins vos n'estîz nin à monde !...
- Michél L'istwère, ça s'aprinde !
- Roland I v'nèt chal avou leûs hopès d'çans' po-z-èsblaw'ter nosse djônèsse, èt l'djônèsse si lèt adîre.. mins, al fin de compte, ci n'est nin l'djônèsse qui s'ritroûve ritche...
- Michél Ritche ! ritche ! a-t-i dandjî d'èsse ritche po viker ? Mi, dji n'neû qu'ine sôre : li novèle ouhène a raminé d'l'ovrèdje po cwate-cints-ovrîs qu'estît foû plèce... Vos djâsez por vos, vos n'vèyez nin pus lon qu'vos ateliers... Avez-v' tûzé âs-omes qui s'lèvèt tos lès djoûs a nole eûre à matin, po-z-èsse so posse a Bruxelles ou ine sawice è payîs flamind, dès-omes qui rintrèt l'al-nut' bon-z-èt târd èt qui sont tél'mint spiyîs qu'i n'ont pus qui l'corèdje di s'coûkî, dès-omes qui n'vèyèt leûs-èfants qui l'sèm'di ou l'dîmègne... ?
- Roland C'èst tos lès bwègnes comptes di l'Université, çoula.. s'on n'avahe nin sèré nos houyîres...

- Michél            On a bin fêt ! vola on mèstî qui fève pus d'mwérts qui d'vikants.., dès djins qui hèm' lèt a tots nos cwènes di rowes.. èlzè vèyez-v' lès cis qu'on a pinchoné al fleûr di l'adje, lès treûs qwârts avizèt vint'ans d'pus...
- Roland            Vos n'savez pus çou qu'vos d'hez.., vos n'comprendrez mây qui lès fougîres, c'est l'vèye, li firté, l'èhowe de payîs walon ! mins c'est vosse payîs ossu !!!
- Michél            Dji n'vou nin d'on payîs qui pampèye pace qu'il a mèzâhe d'êr ! Dès fougîres, la qu'on è-st-oblidjî tos-l'z-ans de r'ponde lès façâdes... L'oneûr, li firté, l'amoûr de payîs, c'est fwèrt bê mins ça n'mète nin de pan so l'tâve !
- Roland            Ça fêt carantes-cink ans qu'dji vike di ç'payîs-la qu'vos mètez a rin, èt divins cisse tchoke-la, vola pus d'vint-ans qui dji t'èl hère è l' boke, li pan ! avou mès-ateliers !...
- Michél            Dj'èl sé bin papa, mins dihez-mèl si vos l'polez : po k'bin d'timps ènn'avez-v'co ? Dokier, Kalbuch, Frankart èt dès cis qu'dji roûvèye, zèl ossu, avît leû tièsse plinte dès minmès îdèyes qui vos.., ça n'èlz'a nin èspêchî de bahî lès brès'.. èt vos sûrez, vos î passerez turtos.., èt vos n'ârez nin twèrt, vos n'ârez pus twèrt, ca vos l'divez rik'nohe, inte lès mins dès-Amèrlokes, on d'vint vite...hupé !!
- Roland            Dokier, Frankart, Kalbuch.., èt ROZÊ !.. nèni , nin Rozê !.. nin mi ! I m'pass'ront so l'cwèr divant d'intrer chal !
- Michél            Çoula n'èlzè djin'rè nin, vos m'polez creûre !... Pa èco 'ne fève vos, todi vos ! vos-ovrîs sont-i turtos deû minme îdèye qui vos,.. Lès çans', c'è-st-ine saqwè d'tèm'tant.., qu'i vinse dès Amèrikins ou qu'ènè vinse d'ôte pâ, lès-ovrîs n'ènn'ont d'keûre de mons qu'i polèsse cori disqu'à prumî botike po discandjî leû qwinzinne disconte çou qui lès fêt viker, disconte çou qui lès fêt-st-ovrer.. c'è-st'ine fâve, c'est todi l'minme fâve qui ratake, mins c'est todi l'minme mèsse qui tint lès guides !.. li pus fwèrt !! Hoûtez-m' bin, papa, i-n-a dès moumints qu'on s'mosteûre pus grand a ployî li scrène qu'a mostrer lès dints...
- Roland            Nin mi, nin ROZÊ !
- Michél            Dji v's-an'mîre papa, mins ça n'chève nin a grand tchwès... In-ôte timps , in-ôte vikèdje, in-ôte payîs mutwè.., èt vos sèrîz rare... si Lèclèrcq vint co...
- Roland            Dj'èl rawåde !
- Michél            S'il a l' boneûr di v'dîre qu'i n'èst nin co trop târd...  
« on bouhe a l'pwète qui done so lès ateliers... »
- Roland            Intrez ! « on fwèrt ome inteûre, il è-st-an salopète ; on l' lome DEBRAZ »

- Roland Ah bondjoû Debraz...
- Debrez Moncheû Rozê.., Moncheû Michél ..., dji n'vôreû nin...
- Roland Achîhez-v', Debraz.., èt vos ossu, Michél, vos n'èstèz nin d'trop' vos-alez ôre lès kèsses èt lès mèsses de syndicat, ca c'est bin çoula qu'vos m'vinez dire bondjoû, èdon Debraz ?... Cigarète ?...
- Debraz Merci !... « *il èsprindèt leû cigarète* »
- Roland Dji v'houîte...vos polez djâser d'vant m'fi...
- Debraz Èt bin vola.., c'est rapôrt às deûs pareûses a bouhî djus.. po rênêrî... A vez-v'oyou l'ocâzion de studî l'projèt,...
- Roland Awè, dji l'a studî .. bouhî djus, ci n'est co rin, mins c'est çou qui vinrè après... A bas mot, i m'a faleûr treûs milions po l'ovrêdje qui vos m'dimandez... po quî m'prindez-v', Debraz ?...
- Debraz Mins...
- Roland Vos sèpez bin qu'nos-avans l'tièsse so l'bloc èt vos n'èstèz mây qu'a briber... Lès-ôvrîs n'sont nin binâhes, c'est todi l'minme tchanson ! Èt mi, qui deû-dj' dire ? Comptez-v' qui dji m'fê' ne p'lote so vos scrènes ?
- Debraz Dji n'a rin dit d'parèy, moncheû Rozê !.. mins nos n'èstans nin de minme costé del bârîre.., nos savans bin qu'vos gangnes rap'titihèt a tos lès côp qu'nos-avans 'ne pitite sawè...
- Roland Ah, vos l'rik'nohez tot l'minme.. à rés', po çou qu'èst d'mès gangnes.., vos savez bin qu'dj'oûveûre a piède !...
- Debraz Tant qu'nos n'avans nin l'dreût de hêrer nosse narène divins vos lîves di compte, nos-èstans bin oblîdjîs di v'creûre...
- Roland Di m'creûre ? mins vos vèyez bin come mi lès k'mandes qui dis-crêhèt, vos camarâdes qui chômet...
- Debraz Dji n'èl sé qu'trop bin ! Juliyin èt Bon' vèye ossu, so leû lét d'ospitâ.., a câse di l'êr mâ-hêtèye.. Ni v'sintez-v'nin on tot p'tit pô rèsponsâbe ?
- Roland Ah, vo-nnè-la assez ! si nos djâssans co, dji m'va mâvler po l'bon.. ossu, dj'inme mîs di v's-èl dire sins lâker.., c'est nèni so l'kèsse de projèt !.. èt rat'nez co çou-chal, Debraz, vos polez fê grève, ça n'mi djinne nin : li cayè dès k'mandes ni s'rimplih nin èt dj'a dès martchandèyes a l'avance.., asteûre, vos polez aller...
- Debraz C'èst come vos l'ètindez, moncheû Rozê.., mins dji mådjinéve..

- Michél Ine munute, moncheû Debraz... si dj'a bin compris, i v'fât d'lêr..., mins po m'papa, i n'fâreût nin on gros-ovrêdje.. come i n'va nin trop rade po l'moumint, dji tûzéve a' ne saqwè qui f'reût d'l'êfèt sins coster trop tchîr..., on vintilateûr fwèrt assez po r'novler l'êr...
- Roland On vintilateûr ?..mmm.. qu'ènnè d'hez'v, Debraz ?...
- Debraz C'èst possipe..., s'i n'a rin d'ôte..., mins dj'a lès pinses qu'ènnè fât bin onk di chake costé...
- Roland Deûs vintilateûrs...deûs vinti...èt l'élèctrike ? ? ?...
- Michél Pa !
- Roland Bon ! on s'pout mutwè arindjî insi, Debraz.. tot rawârdant qu'ça vasse on pô mîs... dji va prinde mès rak'sègn'mints èt vos-ârez rèsponse mâ pô d'timps, dji v's-èl promète... « *li téléfone sone..* » Awè, Rozê a l'aparèy..ah, bondjoû, moncheû l'Dirècteûr... ah, mins bin sûr.. awè, awè .. bin sûr, dji so d'acwér ... vos m'avoyîs çoula d'vins kékes djoûs ?.. O ; K... mèrci, moncheû l'Dirècteûr, â r'vèy..., awè, mèrci !... « *i racrotche, il a l'sorîre...* » Vola'ne saqwè qui v'va bin sûr fê gangnî l'pârt, Debraz : ine kimande di treûs mèye poûtrêles !
- Debraz C'èst bon po turtos, çoula, moncheû Rozê ! Èt po qwand ?
- Roland Dj'èl sârè d'vins kékes djoûs !
- Michél Bon, dji v'lê..., dj'a m'coûrs a qwat'r'èures ;.. èt dj'î va !!
- Roland A la bone èûre ! Dj'inm'reû bin d'esse è vosse plèce, ca mi..., dj'a Lèclèrcq !
- Debraz Lèclèrcq ?...Il èst d'zos qui rawåde..
- Roland Dèdja ?.. èt bin, fez-l'monter, parèt...
- Debraz « *divant dè sôrti* » Plakez-lî li k'mande a s'vizêdje !
- Roland Dji n' î mâk'rè nin ! « *Debraz énnè va* »

### Sinne - 6 - Roland èt Michél

- Michél Pa..., bone tchance !...
- Roland Mèrci, Michél..., vos-èstèz qwand minme di m'costé, èdon ?
- Michél Bin sûr, pa !...sèrez-v' rêzonâbe ?...  
« *Roland hôssih lès spales sins moti ; Michél énnè va tot sèrant l'ouh tot*

*doûç'mint ; on bouhe al pwète di l'ôte dè costé, èt Lèclèrcq inteûre... »*

### **Sinne -7- Rozê èt Lèclèrcq**

- Lèclèrcq      Bondjoû, moncheû Rozê ! on m'a dit qu'dji poléve monter...
- Roland        Awè, moncheû Lèclèrcq..., achiyez'v, dji v's-è prèye...
- Lèclèrcq      Mèrci... dispôy mi dièrinne vizite, avez-v' rèflèchi ?
- Roland        C'è-st-assez dîre qui.. dj'inm'reû bin qu'vos m'rapèlése...
- Lèclèrcq      No condichons !..
- Roland        Si vos volez
- Lèclèrcq      Come dji veû, rin n'a candjî... c'èst tos lès côps l'inme afère : vos m' lèyîz djâser, adompwis, vos v' māvlez, adompwis, vos m'tapez a l'ouh !..
- Roland        Dji n'vis tape nin a l'ouh, dji v'dimande di m'lèyî tûzer.. ; d'ine fèye a l'ôte, on pout aveûr ine îdèye qui pèrmète dè veûy pus clér...
- Lèclèrcq      Pus clér !?.. Dji n'vis catch'rè nin qu'nos k'nohans vosse situacion ossi bin qu'vos, dji v'dîrè minme qui nos v'sûvans pate a pate..., èt qu'nos v'vèyans aller todi pus bas !...
- Roland        Totes lès piceûres sont bones po s'rak'sègnî !.. èdon ?...
- Lèclèrcq      Ça fêt pàrtèye dè djeû !... Djans, mètez-v' bâbe a bâbe avou l'vrêye !.. Lès tchèrbonèdjès, c'èst fini !.. voste-industrèye sins zèls moûrt a p'tit feû.. I n'a pus nol èspwèr di ç'costé-la po l'Walon'rèye..., adon qui d'mane-t-i ?...L'â-d'foû !...
- Roland        Li pûne, ça n'a qu'on timps !
- Lèclèrcq      Dj'an'mète qui vos polez r'novler vos machines, co fât-i po çoula qu'vos-èprontése brâmint dè çans'... èt l'moumint èst pôr mâ tchûzi po v's-èancrer ine gote di pus'.. èt qwand vos-ârez fêt çoula, wice sèrez-v' ? vos nârez fâfiler qu'dès pèces, tot l'rèstant èst halcrosse.., vost-ouhène ni tin pus plèce èssonle èt vola poqwè vos-avez todi pus mâlâhèye dè wârdèr vos pris capâbes d'èsse fwért avou lès cis dè grands martchîs...
- Roland        Vos-ôtes, lès mècheûs dèl hôte finance, sèpez-v' bin wice qui vosse manèje mi va miner ?.. inte lès brès'di tos lès cis qui s'batèt po leû vikèdje, tos lès cis qui s'loumèt : camarâdes.. : lès ovrîs ! Èt vos, vos n'èlzè k'nohez nin lès-ovrîs ; mi bin, ca dji vike avou zèls, mi, dj'èlzè pou co k'mander, mins vos... qui sèrîz-v'inte lès mains dè-ovrîs ?..on n'djowe nin avou zèls come on djowe avou dè bilèts...

- Lèclèrcq Aléz-î ! mètez l'payîs dizos l'poûhance dès syndicats, adompwis zèl mèt'ront l'fèrou so vos gangnes èt vos bènèfices !
- Roland N'èstèz-v' nin chal po l'minme afère ?
- Lèclèrcq Nèni !...fez hôt avou nos-ôtes, vos veûrez bin...
- Roland Dji n'so nin co mwèrt, Lèclèrcq.. on vint di m'passer k'mande po treûs mèye poutchèles !...
- Lèclèrcq Dji sé...di mons DARVANT, ine mohone francèse...
- Roland Kimint... ?
- Lèclèrcq Dji v's-a dit qu'nos savîs tot...TOT !
- Roland I-n-a co bin sûr ôte tchwès ?...
- Lèclèrcq Cisse kimande-la ni v'sèrè payîye qui si lès atèliers ROZÈ intrèt è l'sociètè " JOHNSON èt HILBY " ... qui dji r'prézinte, n'èl roûvîz nin !...
- Roland QWÈ ?.. vos f'vrîs çoula ?
- Lèclèrcq ..Manîre di v'mostrer çou qu'nos polans.., ou.. çou qu'vos n'polez pus...
- Roland ..Mins poqwè mi ? poqwè v's-acharner sor mi ?
- Lèclèrcq Pace qui vos-avez dèl min-d'eûve qualifiyêye, moncheû ROZÈ.. qui nos vinreût bin a pont...
- Roland Huflez tot vosse tchap'lèt, Lèclèrcq...
- Lèclèrcq Sorlon nos calculs, li trô d'vosse hêsse-qui s'droûve todi pus fwèrt-bètch'rè lès treûs millions al fin d'l'annêye.. wice lès trouv'rez'v' ?
- Roland Poqwè n'trouv'reû-dj'nin tot seû l'ovrèdje qui vos trouv'rîz por mi ?...
- Lèclèrcq Tot simplumint pace qui vos n'avez nin l'brès' long assez !.. èt pace qui nos sèrîs so vosse vôle.., comprindez'v' ?... Nos v'lèyans co aler deûs bons meûs .., disqu'às condjîs.., après, nos r'prindrans l'afère !...
- Roland Si dj'èl vou bin !
- Lèclèrcq Bin sûr, moncheû Rozê, vos-èstèz mèsse èt ..djudje, mins.. dji v's-ârè prèv'nou : vos-v's-alez r'trover to fî seû, èt mà pô d'timps, vos pwètes sèront sèrèyes.., come lès-ôtes.. Kalbusch...
- Roland Têhîz-v' !.. dj'èlzè k'nohe !...



- Lèclèrcq      Tos cès-la sont dèdja.. come on dit : " riconvèrtis "...
- Roland        Èt qu'èst-ce qui c'èst : èsse " riconvèrtis " ?...
- Lèclèrcq      Djâsans d'abôrd di vos : nos v'wârdans come dîrècteûr-jèrant.., vos k'nohez bin vos-omes, vos-avez d'né lès proûves qui vos'lzè savîz miner-bin qu'lès walons n'sèyèsses nin âhèye a aduzer... Tant qu'a vos gangnes, on'lzè calcul'rè d'après vos bènèfices dès cink dièrinnès-annêyes.., pus'..ine pîme al produc'sion... vos vèyez : qui l'fabrike vâye d'adreût èt vos n' ârez nin a v'plinde...
- Roland        Qwand dji tûze qui çou qu'vos m'dihez la, vos l'avez dèdja d'bité co traze èt co traze fèyes a dès parèy qui mi.., dès rascrâwès !... vos m'disgostez !...
- Lèclèrcq      Ci n'èst tot... nos k'nohans ossu a on franc près, li valeûr di voste-ouhène.., nos r'mètans d'sus treûs fèyes ot'ant èt vos-intrez â consèy d'Ad'ministrâcion po l'dîhinne dès pârts... A-dj'dju mèzâhe di v'dîfre qu'a ç'moumint-la, vos-ârez co dès-abondreûte.., à n'nin taper so l'costé... Ni roûvîz nin vos-èfants, vosse fèye surtout.. èt vosse feume qu'ont pris l'pleû dèl pèter hôt, dè fé dès hârs èl bouÛsse.., dji dote qu'èle polèsse rastrinde leûs-âbitudes...
- Roland        Èl fâre ! Nos-arivr'ans bin a v'tchèssî èvôye !...
- Lèclèrcq      Ta, ta, ta, ta...vèyez-v', moncheû Rozê, qui vos l'volez' ou nin, on v'prind po on bordjeû.., èt c'èst si deûr dè r' toumer... È vosse plèce...
- Roland        Qwand m'fi àrè fini sès scoles, i vinrè ad'lè mi, èt nos sèrans nos deûs.. èt nos sèrans pus fwèrts !...
- Lèclèrcq      Divins deûs ans, treûs ans, vos n'sèrez pus nouk..., èt pwis, vosse fi n'veût nin voltî l'vèye dès-ateliers, i vike avou s'timps, i n'a pus lès îdêyes qui vos-avîz a si-adjè.. On lî a tant djâsé d'vos, l'prumîr-d'ine rilûhante Walon'rière, di sès bês djoûs, la qu'èlle èsteût vigoureûse.. qu'i n'supwète nin d'èl veûy mori : èl vout come d'avance !.. èt lu, sé bin qu'nos èstans l'seûle tchance d'èl fé r'flori...
- « *On bouhe al pwète* »
- Roland        Intrez !...      « *c'èst Debraz* »

### Sinne - 8 - Roland, Lèclèrcq, Debraz.

- Debraz        Moncheû Rozê, dji...
- Roland        Vos toumez a pont, Debraz.... « *A Lèclèrcq* » Ârez-v' li corèdje dè repèter a Debraz çou qu'vos m'avez dit tot-asteûre ? Prindez astème, Lèclèrcq, vos-avez d'vant vos l'ome qui r'pézinte li fwèce di mès ovrîs...
- Lèclèrcq      Qui dji v'dèye seûl'mint, moncheû Debraz, qui vos-alez fé pàrtèye dèl mohone " Johnson èt Kilby "...

- Debraz            Qwè ?...moncheû Rozê...
- Roland            Houtez, Debraz...
- Debraz            Vos-avez ployî ?
- Roland            Dji deû vinde, Debraz , nos n'sârîs pus tinre !...
- Debraz            ..Mins l'novèle kimande ? « *Rozê fêt sène " nèni " avou s'tièsse* » Ah ! lès rin-n'vâts !...èt qu' ârans-gn' cwand l'discandje sèrè fête ?
- Lèclèrcq        Si çoula v'pout akeûhi, sèpez' qui v's-èstèz d'vins lès cis qu'on va wårder...
- Debraz            Èt lès-ôtes ?
- Lèclèrcq        Nos' lzè wåd'rans... s'i fèt l'proûve qu'i sont capâbes...
- Roland            Tos mès-ovrîs s'î ètindèt !
- Lèclèrcq        ..Dji v'dimande èscusse mins dji creû qu'dj'a roûvî di v'dîre ine saqwè : l'ovrèdje ni sèrè pus l'minme...
- Roland            ..Qui mèt'rez-v' è l'plèce ?
- Lèclèrcq        Ine ouhène di plastike...
- Roland            Di PLASTIKE ? !.. mins vos div'nez sots !!!
- Lèclèrcq        Oh nèni, moncheû Rozê, c'est l'siêke de plastike...on' nnè fêt dèdja dèès mohones..., onk di cès qwate, on'nnè va fé dèès ponts, vos alez veûy !...
- Debraz            Èt vos comptez qu'çoula s'va passer insi ? C'èst l'misère qui vos aminez chal !.. dji sé bin çou qui s'passe avou lès-ovrîs dèès-ouhènes qu'on a sèré : dèès grozès çans'po quéqu'onk, mins l'ovrèdje d'on dâné po lès-ôtes..., a tchoûkî so dèès botons, sins wèzeûr taper'ne loukeûre so l'costé.., on d'vint tot parèy qui l'machine qu'on a d'avant lu... Kibin' nnè mèt'rez-v' à chômèdje ? Kibin 'nnè mèt'rez-v'al pinchon d'avant leû timps ? C'è-st-ine mâcule abôminâbe qui vos-alez fé la !.. mins mi, dji n'so nin chèrvûle assez por vos, dji tûze a mès camarâdes èt dji d'mane avou zèls... À rés', dj'èlzî va rinde compte tot dreût èt nosse çantrale si va mète èn-alèdje èt vos veûrez d'on seûl coûr li djint dèl Walon'rèye po r'prinde lès-âbarones èt rimpli lès lèvèyes.. Dimèsfiyîz-v' ca l'vwè dèès ovrîs, c'èst l'pus grande dèès ârmèyes, li cisse qui disfind lès pus grandès libèrtés !
- Lèclèrcq        Ou bin l'cisse qui fêt s'prôpe mizère ! Moncheû Rozê n'a pus l'tchûze, èt ci n'èst nin vos, Debraz, ni tote voste-ârmèye qu'èspètch'ront vosse mèsse de vinde li fabrike ! « *I mète on papî so l'burô divant Rozê* »

- Debraz Ni sinez nin, moncheû Rozê ! Al copète di nos difèrinces, al copète di nos pareûses, nos-avans lès minmès rûses èt tos lès ovrîs sont-st-avou vos po cisse kèsse-la ! Ni sinez nin, moncheû Rozê ! !
- Lèclèrcq Vos sèrez so l'pavèye !
- Debraz Pavèye po pavèye, dji n'rawåde nin qu'on m'î tape, dj'î va di m'plin sintumint..po m'î aller bate !
- Roland Debraz, c'est bin pace qui dji tûze a tos vos-ôtes qui...
- Lèclèrcq C'est djusse ! si vos-avez co'ne saqwè a sâver, sinez !
- Debraz Ni sinez rin ! Si vos l'fer, vos nos vindez turtos ! 'N-a-t-i nin'ne lwè qui v's-èl disfind ?..vos-ovrîs n'ont-i nin leû mot a dire ? S'i-n-a co dèl ritchèsse avâ lès ateliers Rozê, ci n'est nin vosse capitâl tot seû qui l'a fôrdjî, c'è-st-ossu nos brès', noste-èhowe, noste-ovrèdje ! Si vos sinez, nos pièrdans tot çoula !...  
« *Roland èt Debraz s'loukèt pwis Roland sène* » C'est l'oneûr di nosse payîs walon qui vos v'nez dè d'lâborer â-d' dizos d'on fayé bokèt d'papî !
- Roland Dji mèrite mutwè vosse hayîme, mins.. dj'ennè polève pus !  
« *Debraz sôtèye tot clapant l'pwète podrî lu* »

### Sinne - 9 - Lèclèrcq èt Roland

- Lèclèrcq Il a lès djvès tot près dèl tièsse, vosse Debraz.. li saminne qui vint, i n'î tûz'rè pus...
- Roland Alez-è, Lèclèrcq !...
- Lèclèrcq Bon.., bin dji creû qu'c'est tot.. divins'ne dîhinne di djoûs, nos spéciyâlistes sèront la po loukî l'afêre di s'pus prêt.. quarante-cink ans, moncheû Rozê, c'est co djône, vos alez poleûr profiter dèl vèye...
- Roland Alez-è ! Alez-è ! ALEZ-È !!! « *Lèclèrcq coûrt èvôye* »

### Sinne - 10 - Roland, Mariète, èt Michél

« *Rozê, al dilouhe, va vè sès classeûrs, sirapôye, pleûre ; di raje, i tape al valèye sès classeûrs.., fougner tève è fond dèl bibliotèque èt ramone on révolver ; Intrèt Mariète, èt podrî lèy, Michél* »

- Mariète Roland !
- Roland Mariète !.. Michél.., vos avîz dit : ine bale è' l' tièsse....  
« *I tère, li canon d' l'arme vè l'timpe dèl tièsse, mins l'côp pète a vû ; Mariète court sor lu, li prind d'vins sès brès', plorant, riyant..* »
- Mariète Roland ! mi p'tit Roland ! qu'alîz-v'fé ? qui volîz-v'fé ? c'èst tot asteûre ! C'èst tot !...
- Roland Dji n'a pus d'ouhène... dji n'so pus Roland Rozê ! quî èst-ce qui m'vout wårder l'vèye ?
- Michél Mi ! dj'aveû wèsté l'tchèrdjeû ! Dji saveû bin, papa, qui vos'nn'ariv' rîz la !..
- Roland Poqwè ? poqwè ?..
- Michél Pace qui nos-avans dandjî d'vos èt qu'i sèreût timps d' î tuzer... nos-ôtes d'abôrd.., èt l'Walon'rèye ossu.. tant qu'èle mèt'rè å monde dè Roland Rozê, èle ni moûr'rè måy.. vos-alez -st-ovrer po l'rafwèrci, po-z-arèster s'magnant må, po l'riwèri.. AVOU lès çans' dè Amèrikins ! Vos fom'rez leûs gros cigâres, vos' lzî frez dè courubètes tot sèrant vos pogn' divins vos potches.., mins vinrè l'djoû, papa, divins dih ans, vint-ans, trinte ans, vos-ârez vosse rivindje, vos' lzî frez dè hègnes a leû narènes... Prindez l'timps dè rakeûze lès plâyes, dji so sûr qui vos l'veûrez ç'djoû-la...
- Roland In-ôte timps.., in-ôte vikèdje...
- Michél Awè, papa, èt nos'lzè bout'rans foû !
- Mariète Vinez, Roland, asteûre, vos v'divez r'pwèzer.. vinez !  
« *Èle sôtève, tot t'nant si-ome* »  
« *Michél ramasse li révolver, li hère è s'potche, va vè l'burô, fêt on numèrô d'tèlèfone...* »
- Michél ..Moncheû.., Marie-Christine Rozê è-st-èle la ? dihez-lî qui s'fré l'dimande... Merci... Marie-Christine ?...oh, dji saveû qu'dji v'trouv'veû la...i fâreût riv'ni d'on côp, vosse plèce èst-st-ad' lé vosse papa... dji v's-èsplik'rè...  
« *i racrotche* » Vos-avez tant dit, soûr, qui Roland Rozê èst l'ome di vosse vèye..., c'èst l'moumint d'lî mostrer, mins.. ci sèrè deûr..., fwèrt deûr !...  
« *i sôtève* »